

Maphunziro a anyamata ndi atsikana a zaka 12-17

-
1. Colinga ca miyoyo yathu
 2. Kuthetsa mabvuto
 3. Ubwenzi
 4. Kukakamizidwa ndi abwenzi
 5. Kusamalira cilengedwe ndi thupi langa
 6. Cikhalidwe
 7. Tsogolo langa
-

Phunziro 1 Colinga ca miyoyo yathu

Cofunikira pa nthawi yophunzitsa

- Bolodi
- Coko
- Baibulo

1. Kulandiridwa (10 min)

- Landirani onse.
- Fotokozani kuti anyamata ndi atsikana adzaphunzitsidwa mfundo zosiyana-siyana, mwacitsanzo ubwenzi, kudzisamalira ndi tsogolo lathu.
- M'phunziro lirilonse tidzawerenga Baibulo cifukwa maphunziro onse akhala cabe pa zimene Baibulo likamba.

Zidziwitso

- Maphunzirowa ndi a anyamata ndi atsikana a zaka 12-17.
- Phunziro lirilonse lidzayamba pa nthawi ya koloko. Onse afike pa nthawi yake cifukwa ngati acedwa sitidzakhala ndi nthawi yokwanira.
- Ndi cofunikira kwambiri kubwera ku maphunziro onse.
- Aphunzi ayenera kulowa ndi Baibulo m'maphunziro onse. Tidzalifuna pophunzira maphunziro a m'Baibulo.
- M'phunziro lotsiriza tidzalembe mayeso (mphunzitsi adzasankha ngati mayeso adzalembedwa). Kulemba mayeso sikudzakhala bvuto ngati mudzaphunzirako maphunziro onse.

Malamulo

- Ana a zaka zocepera 12 sadzaloledwa, ndiponso osabwera ndi ana ang'ono-ang'ono.
- Osayenda-yenda (pitani ku cimbudzi musanayambe kuphunzira).
- Khalani bwino ndipo mverani bwino mphunzitsi wanu. Khalani omasuka.
- Funsani ngati aphunzi ali ndi mafunso.
- Pemphani Mulungu dalitso la phunziro iri.

2. Kulengedwa (10 min)

- Funsani anyamata ndi atsikana kuti dziko lapansi licokera kuti: ciyambi cake cinali cotani? Auzeni kupereka mayankho osiyana-siyana omwe iwo anamva ku calichi, ku sukulu ndi m'mudzi. Lembani mayankho ao pa bolodi.
- Auzeni kuti tikhulupirira kuti Baibulo ndi coonadi. Baibulo litiuza kuti Mulungu analenga kumwamba ndi dziko lapansi. Kulenga kutanthauza kupanga cinthu kunalibe kanthu. Mulungu sanalengedwe koma analiko nthawi zonse.
- Auzeni kupereka zitsanzo za zolengedwa, mwacitsanzo mitengo, anthu, mbalame ndi mitambo.
- Auzeni kuti lero tidzaganizira ciyambi ca dziko lapansi. Ciyambico ciri ndi zotsatira kuli miyoyo yathu.

3. Genesis 1 ndi 2 (20 min)

- Funsani aphunzi kuti dziko lapansi labwino kwambiri lioneke lotani kulingana ndi iwo.
- Fotokozarani nthano ya kulengedwa kwa zonse (Genesis 1 ndi 2). Fotokozani zimene Mulungu analenga pa tsiku lirilonse. Fotokozani kuti zonse zinali zabwino kwambiri, cifukwa Mulungu yekha ndi wabwino ndi woyenerera.
- Fotokozani kuti kunali ubwenzi wabwino:
 - A. Ubwenzi wa anthu ndi Mulungu: kunali cikondano, kunalibe cisokonezo. Mulungu ankalandhula ndi Adamu ndi Hava tsiku ndi tsiku. Ankayenderana nao. Adamu ndi Hava anadziwa Mulungu ndipo anamkonda.
 - B. Ubwenzi wa anthu: kunali cikondano, kunalibe ndeu.
 - C. Ubwenzi wa anthu ndi cilengedwe cina: zonse zinali m'ubwenzi wabwino, kunalibe mantha kapena imfa. Anthu sanadwale, nyama sizinali zoopsa.
- Fotokozani kuti zonse zinali zabwino kwambiri. Anthu anakhala kulingana ndi colinga ca Mulungu: anamumvera ndi kutumikira Mulungu. Anakhala nao moyo.

4. Kuwerenga Baibulo (30 min)

- Uzani aphunzi kutsegula Baibulo lao.
- Werengani pamodzi Genesis 3.1-13 ndi Genesis 3.22-24.
- Lembani mafunso awa pa bolodi ndipo uzani aphunzi kuyankha mafunsowa m'magulu ang'ono.

Mafunso

1. Fotokozani mwacidule zimene zinacitika kulingana ndi Genesis 3.
2. Ndi cifukwa ciani Adamu ndi Hava anadya zipatso zimene Mulungu anawaletsa kudya?
3. Atacimwa Adamu ndi Hava, ndi ciani cimene cinacitika ndi ubwenzi wa Mulungu ndi anthu?
4. Ndi ciani cimene cinacitika ndi ubwenzi pakati pa anthu?
5. Ndi ciani cimene cinacitika ndi ubwenzi wa anthu ndi zolengedwa zina zonse?
6. Taphunzira kuti zonse zinasinthika pamene Adamu ndi Hava sanamvere Mulungu. Kodi Mulungu anasinthikanso?
7. Kodi tingaphunzire ciani m'nthano iyi kuli Satana?

- Itakomana 10 minutes, kambiranani pamodzi mayankho. Mayankho abwino ali conco:
 1. **Fotokozani mwacidule zimene zinacitika kulingana ndi Genesis 3.**
Yankho: Anthu sanamvere Mulungu. Anadya cipatso coletsedwa. Kusamvera ndi chimo. Kusamvera kwao kunali bvuto lalikulu pakuti zonse zinasinthika kucokera pa nthawi iyo.
 2. **Ndi cifukwa ciani Adamu ndi Hava anadya zipatso zimene Mulungu anawaletsa kudya?**
Yankho: Anakhulupirira Satana amene adawauza kuti iwo adzakhala ngati Mulungu ndiponso kuti sadzafa atacitira Mulungu mwano.
 3. **Atacimwa Adamu ndi Hava, ndi ciani cimene cinacitika ndi ubwenzi wa Mulungu ndi anthu?**
Yankho: Ubwenzi ndi woonongeka. Adamu ndi Hava anaopa pozindikira kuti acimwa. Mulungu anawacotsa m'munda wa Edeni. Ubwenzi unatha. Anthu ocimwa saloledwa kukhala pafupi ndi Mulungu. M'malo mwa ubwenzi kuli udani (kucimwa kutanthauza kuda Mulungu).

4. Ndi ciani cimene cinacitika ndi ubwenzi pakati pa anthu?

Yankho: Ubwenzi ndi woonongeka. Kuli mabvuto ambiri pakati pa anthu, monga tiona tsiku ndi tsiku m'miyoyo yathu. Adamu ndi Hava atacimwa, anayamba kuikana mlandu.

5. Ndi ciani cimene cinacitika ndi ubwenzi wa anthu ndi zolengedwa zina zonse?

Yankho: Ubwenzi unatha. Nyama zinayamba kubvutitsa anthu, nyama zina zimaopa anthu.

6. Taphunzira kuti zonse zinasinthika pamene Adamu ndi Hava sanamvere Mulungu. Kodi Mulungu anasinthikanso?

Yankho: Iai, Mulungu sanasinthike. Iye akhalabe Mulungu woyera ndi woyenerera monga anakhala pa ciyambi.

7. Kodi tingaphunzire ciani m'nthano iyi kuli Satana?

Yankho: Satana anali woyamba wonena bodza. Iye ndi wosakhulupirika. Afuna kutiononga. Koma sitiloledwa kuika mlandu pa Satana, cifukwa ife anthu asankha kumumvera cifukwa ca mtima wao woipa.

5. Nthano ya m'Baibulo (20 min)

- Masulirani bwino mogwiritsa nchito mau osabvuta, nthano yopezeka m' Genesis 3.1-13 ndi Genesis 3.22-24 (uphunzitsi wa Sukulu Sondo wa ana).
- Fotokozani kuti kucokera ku nthawi iyo, anthu alephera kukhala momwe Mulungu afuna. Anthu onse ndi ocimwa (mtengo wa mango ubereka mango cabe). Mtima wa anthu onse ndi wosinthika: m'malo mwa kudzipereka kwa Mulungu ticita zimene Mulungu aletsa, tiganiza kuti tidziwa bwino kuposa Mulungu.
- Funsani anyamata ndi atsikana zitsanzo za macimo ndipo lembani mayankho ao pa bolodi. Chimo litanthauza: kucita zoletsedwa ndi Mulungu komanso kusacita zimene Mulungu atilamulira.
- Afotokozereni kuti kulingana ndi Baibulo, Mulungu afuna kuti tizimtumikira ndi mtima wathu wonse, nzeru zathu zonse ndiponso macitidwe athu onse, nthawi zonse. Ngakhale kuganiza cinthu coletsedwa ndiko chimo: Mulungu adziwa zonse!
- Fotokozani kuti anthu ocimwa ayenera kulangidwa ku Gehena nthawi zonse cifukwa ca macimo ao. Fotokozani kuti kuli Njira imodzi cabe yopulumutsidwiramo: Yesu Kristu amene anafa pa mtanda cifukwa ca macimo. Aliyense amene akhulupirira Yesu (kuulula macimo ake ndi kudzipereka kwa Yesu) akhululukidwa ku macimo ake ndipo adzakhala ndi Mulungu Kumwamba muyayaya.

6. Colinga ca miyoyo yathu (10 min)

- Uzani anyamata ndi atsikana kukambirana za colinga ca miyoyo yao: Ndi cifukwa ciani ali pa dziko lapansi?
- Atakambirana, auzeni kupereka mayankho ao m'gulu lonse.
Yankho: tiri pa dziko lapansi kumvera, kutumikira ndi kulemekeza Mulungu.
- Afunseni funso iri, 'Tingamumvere, tingamtumikire ndi kulemekeza bwanji Mulungu?'
Yankho: Ngati tidziwa ndi kucita zimene zilembedwa m'Baibulo.
- Fotokozani kuti m'maphunziro ena atsogolo, tidzaganiza za miyoyo yathu ndi zimene Mulungu akamba kuli miyoyo yathu. Akumbutseni kuti ndife olengedwa ndi Mulungu. Iye ndi Mwini wathu ndipo tiyenera kucita zimene Iye afuna!

7. Sewero (10 min)

- Mphunzi aliyense akhale pafupi ndi mnzake umodzi. Auzeni kusewera sewero iri: Mphunzi m'modzi achula cinthu cimodzi colengedwa ndi Mulungu (mwacitsanzo dzuwa). Mnzake ayenera kuchula cinthu cina cimene ciyamba ndi lembo lotsiriza la liu lokambidwa ndi mnzake (dzuwa – amai). Mnzake ayenera kuchula liu lina loyambira ndi lembo lotsiriza la liu lokambidwa ndi mnzake, ndi zina zotere. Mwacitsanzo: dzuwa – amai – inswa - anthu – usiku.

8. Kutsiriza (5 min)

- Funsani aphunzi zimene aphunzira lero.
- Bwezeraninso kuti colinga ca miyoyo yathu ndico kumtumikira, kumumvera ndi kumlemekeza Mulungu m'zonse zomwe ticita. Fotokozani kuti tiyenera kudziwa Yesu kuti timvere Mulungu moyenerera. Aphunzitseni 1 Akorinto 10.31b, 'Citani zonse ku ulemerero wa Mulungu'.
- Pempherani.

Phunziro 2 Kuthetsa mabvuto

Cofunikira pa nthawi yophunzitsa

- Bolodi
- Coko
- Baibulo

1. Kulandiridwa (10 min)

- Landirani onse.
- Pempherani.
- Funsani anyamata ndi atsikana zimene akumbukira za m'phunziro 1.

2. Kufotokoza (10 min)

- Fotokozani kuti kucokera pa nthawi ya kucimwira Mulungu (monga tinaphunzira m'phunziro 1), timakomana ndi mabvuto ambiri m'miyoyo yathu.
- Funsani aphunzi kuti akomana ndi mabvuto otani m'miyoyo yao. Ganizirani za mabvuto osiyanasiyana: kuli makolo/abwenzi, ku sukulu, zosowa m'umoyo ndi zina zotere.
- Fotokozani kuti pamene pali bvuto, tiyenera kusankha kucita ciani: kuyesa kulithetsa kapena kusayesa kulithetsa. Zonse zimene tingacite ziri ndi cotsatira cake: cithandiza kapena sicithandiza. Fotokozani kuti tiri ndi mphamvu kucita kanthu, ngakhale ndi kanthu kakang'ono. Ngati siticita kanthu, kulinso cotsatira!

3. Zolowapo (30 min)

- Kambiranani pamodzi zolowapo izi (kapena zilembeni pa bolodi ndi kuuza aphunzi kuyankha mafunso m'magulu ang'ono).

Colowapo 1: Saulos

Saulos ali ndi zaka 12. Amakhala ku Petauke. Mai wake anafa pamene Saulos anali ndi zaka 5. Tate wake anakwatira mkazi wina koma Saulos amvera kuti sasamalidwa bwino. Nthawi zina mkazi wa tate wake amuuza kuti ayenera kukhala ku nyumba ina. Akambirana kwambiri ndipo Saulos samvera bwino.

Mafunso:

1. Ndi cifukwa ciani Saulos samvera bwino?

Yankho: Sakumva kuti makolo amkonda.

2. Kulingana ndi inu, Saulos ayenera kucita ciani? Ndi cifukwa ciani ayenera kucita motere?

Yankho: Kupemphera, kupempha thandizo kwa munthu wanzeru kapena kufunsa wina a m'banja kuti angamlole kukhala nao.

Colowapo 2: Marita

Marita ali ndi zaka 14. Mnyamata wa ku sukulu anampatsa mimba. Marita adera nkhawa za tsogolo lake ndipo aopa kuuza munthu wina za mimba yake. Sakhoza kugona cifukwa sadziwa cimene adzacita. Marita apanikizika.

1. Kambiranani pamodzi zimene Marita angacite. Patsani yankho zitatu zosiyana-siyana.

Yankho: Kuuza mnyamata, kufunsira upangiri kwa munthu wina, kupempha Mulungu kumpatsa nzeru ndi cikhululukiro.

2. Ngati ndinu mnzake wa Marita, mumuuzze kucita ciani kodi? Ndi cifukwa ciani mumuuzze kucita tero?

Yankho: Aliyense ayankhe pa yekha. Fotokozani kuti kutaya mimba si yankho kulingana ndi Baibulo.

Colowapo 3: Luka

Luka ali ndi zaka 17. Sanatsirize sukulu cifukwa kunalibe ndalama yolipira sukulu. Luka alibe nchito ndipo masiku onse sadziwa kucita cinthu cina ciriconse. Makolo ake afuna kuti apeza nchito koma Luka sakwaniritsa kupeza. Ici cibvutitsa banja lonse. Luka afuna kuiwala bvuto lake ndipo ayamba kumwa mowa ndi kupepa fodya.

1. Kodi kumwa mowa ndi kupepa fodya kuthandiza kuthetsa mabvuto m'njira yotani?

Yankho: Kuthandiza kuiwala cabe, koma sikuthetsa bvuto.

2. Kodi kumwa mowa ndi kupepa fodya kuthetsa mabvuto? Ndi cifukwa ciani mwayankha motere?

Yankho: Iai, kumwa mowa ndi kupepa fodya sikuthetsa mabvuto. Koma mabvuto amacuruka cifukwa mufuna ndalama yogula mowa ndi fodya.

3. Kodi ngati ndinu mnzake wa Luka, mumuuzze kucita ciani? Ndi cifukwa ciani mwayankha motere?

Yankho: Aliyense ayankhe pa yekha.

Colowapo 4: Edina

Edina ali ndi zaka 12. Ali m'giredi 5 ndipo amacita bwino ku sukulu. Koma mphunzitsi wake samcitira bwino. Pamene alakwa mphunzitsi wake amuza kubwera kutsogolo ndipo ayamba kufotokoza kuti ndiye mwana wopusa amene sadzalembe bwino mayeso m'giredi 7. Edina samvera bwino ku sukulu ndipo aganiza za kuleka kupita ku sukulu.

1. Ndi cifukwa ciani Edina apanikizika?

Yankho: Akumva kuti sacitidwa bwino, mphunzitsi wake samumvetsa ndipo akumva monga akhala cabe.

2. Kodi ngati ndinu mnzake wa Edina, mumuuzze kucita ciani?

Yankho: Mwacitsanzo kumthandiza, kumpangira, kupita naye kukauza munthu wina zimene ziri kucitika, kumcitira bwino.

3. Kodi mudziwa anthu amene abvutidwa monga Edina?

Yankho: Aliyense ayankhe pa yekha.

- Fotokozani kuti ng'anga si wanzeru kuti tingampemphe thandizo (Levitiko 19.31, Levitiko 20.27, Cibvumbulutso 22.15).

4. Kuwerenga Baibulo (20 min)

- Fotokozani kuti m'Baibulo tiwerenganso za anthu obvutika. Tidzawerenga nthano ya Bartimeyu ndi m'mene bvuto lake linacotsedwa.
- Uzani aphunzi kutsegula Baibulo lao.
- Werengani pamodzi Marko 10.46-52.
- Pang'ani magulu ang'ono ndipo uzani aphunzi kuyankha mafunso awa omwe mulemba pa bolodi.

Mafunso

1. Fotokozani mwacidule zimene zinacitika m'nthano iyi.
2. Kodi kulingana ndi inu, Bartimeyu anamva bwanji pa kukhala wakhungu?
3. Kodi Bartimeyu anacita ciani kuti bvuto lake licotsedwe?
4. Ndi ciani cimene ciri cofunikira coposa pamene tikomana ndi mabvuto?
5. Anthu ena amene anali pafupi ndi Bartimeyu anafuna kuti aleke kupfuula kwa Yesu. Sanamthandize. Kodi mudziwa anthu amene akhoza kukuthandizani pamene muli ndi bvuto m'moyo wanu?

- Itakomana 10 minutes, kambiranani pamodzi. Mayankho abwino ali conco:
 - 1. Fotokozani mwacidule zimene zinacitika m'nthano iyi.**
Yankho: Bartimeyu anali wakhungu. Anapempha Yesu thandizo lake. Yesu anamciritsa.
 - 2. Kodi kulingana ndi inu, Bartimeyu anamva bwanji pa kukhala wakhungu?**
Yankho: Mwacitsanzo anakhala wacisoni, wosasamalidwa, wopanikizika.
 - 3. Kodi Bartimeyu anacita ciani kuti bvuto lake licotsedwe?**
Yankho: Anapempha Yesu kumthandiza.
 - 4. Ndi ciani cimene ciri cofunikira coposa pamene tikomana ndi mabvuto?**
Yankho: Kupempha Mulungu thandizo ndi nzeru kuti tidziwe kucita ciani.
 - 5. Anthu ena amene anali pafupi ndi Bartimeyu anafuna kuti aleke kupfuula kwa Yesu. Sanamthandize. Kodi mudziwa anthu amene akhoza kukuthandizani pamene muli ndi bvuto m'moyo wanu?**
Yankho: Mwacitsanzo membala a mpingo, mphunzitsi kapena munthu m'mudzi.

5. Nthano ya m'Baibulo (20 min)

- Masulirani bwino mogwiritsa nchito mau osabvuta, nthano yopezeka m' Marko 10.46-52 (uphunzitsi wa Sukulu Sondo wa ana).
- Fotokozani zimene tingaphunzire m'nthano iyi:
 1. Mulungu ndi wamphamvu zonse. Akhoza kuthetsa bvuto lina lirilonse. Mpempheni thandizo.
 2. Baibulo liphunzitsa kuti ndife akhungu m'uzimu (2 Petro 1.9, Cibvumbulutso 3.17). Ici citanthauza kuti ndife ocimwa ndiponso kuti sitikhoza kudziwa Mulungu pokhapo ngati Mulungu atiyeretsa ku macimo athu. Mulungu afuna kucita tero cifukwa ca Yesu amene anafa pa mtanda kukhululukira macimo. Mpempheni cikhululukiro.

6. Sewero (10 min)

- Pangani magulu anai. Uzani gulu lirilonse kukonzekera nthano ya pa wailesi m'mene afotokoza zimene tiyenera kucita ngati tikomana ndi bvuto .
- M'modzi wa gulu lirilonse afotokozere nkhani yao ya pa wailesi.

7. Kutsiriza (5 min)

- Funsani aphunzi zimene aphunzira lero.
- Bwezeraninso kuti colinga ca miyoyo yathu ndico kumtumikira, kumumvera ndi kumlemekeza Mulungu m'zonse zomwe ticita. Fotokozani kuti tiyenera kudziwa Yesu kuti timvere Mulungu moyenerera. Aphunzitseni 1 Akorinto 10.31b, 'Citani zonse ku ulemmerero wa Mulungu'.
- Pempherani.

Phunziro 3 Ubwenzi

Cofunikira pa nthawi yophunzitsa

- Bolodi
- Coko
- Baibulo

1. Kulandiridwa (10 min)

- Landirani onse ndipo pempherani.
- Funsani anyamata ndi atsikana zimene akumbukira za phunziro 2.
- Fotokozani kuti tinaphunzira kuti Mulungu analenga kumwamba ndi dziko lapansi. Anatilenga ndipo analenganso anthu ena onse. Cifukwa ca uchimo umene unalowa dziko lapansi, ubwenzi wonse ndi woonongeka, ngakhale ubwenzi wa munthu ndi mnzake. Lero tidzaganizira za kukhala bwenzi wabwino.

2. Citanthauzo ca ubwenzi (20 min)

- Funsani anyamata ndi atsikana citanthauzo ca 'ubwenzi'.
- Lembani mau awa pa bolodi.

cikondi	kukhala wacoonadi	kusakhulupirika
thandizo	kumvetsetsa	kusagwirizana
cisamaliro	kukhulupirika	kutsutsidwa
kudekha	ulemu	mjedo
nsanje	citsanzo cabwino	

- Uzani mphunzi m'modzi pa nthawi kubwera ku bolodi. Afunseni kuti azungulire mau amene alimbikitsa ubwenzi wabwino ndi kukweza mau amene aononga ubwenzi wabwino.
- Kambiranani pamodzi za mau amene alimbikitsa ubwenzi wabwino ndi amene aononga ubwenzi wabwino.

4. Colowapo (10 min)

- Khalani pansi m'magulu ang'ono ndipo kambiranani colowapo ici:
Mnzanu wa pa mtima akhala bwenzi wa munthu wakumwa mowa. Nthawi zambiri mnzanu apita ku malo omwera mowa kuti amwe ndi mnzakeyo watsopano. Ku sukulu zotsatsira za mayeso ake zikhala zoipa koposa. Kodi muyenera kucita ciani pokhala mnzake wa pa mtima?
- Atakambirana m'magulu ang'ono, kambiranani pamodzi.
Yankho: Kumcenjeza, kuuza anthu ena kuti pamodzi mungathandize mnzanu kuleka kumwa mowa. Koma khalani maso kuti inu nomwe simuyambanso kumwa mowa.

5. Nkhani ya Alani (15 min)

- Aphunzitsi awerengere aphunzi nthano ya 'Alani ndi tomato woola'. Mutawawerengera kambiranani pamodzi, 'Kodi tingaphunzire ciani m'nthano iyi?'

Nkhani

Tomato woola

Alani anali ndi abwenzi awiri oipa. Makolo a Alani anali kumuuzza nkhani za m'Baibulo ndi kumuonetsa zitsanzo zabwino, cifukwa anali ndi nkhwana pakuona iye ali kuyenda ndi anyamata awiri omwe sanali ndi makhalidwe abwino. Atate ake anamuuza kuti safunika kukhala nao, koma Alani anaganiza kuti kukhala nao cinali cabwino ndi coseketsa. Anaganizanso kuti sicingabweretse coipa ciriconse.

Tsiku lina atate ake anati kwa iye: 'Alani, pita ku munda ndipo ukatyole tomato umodzi wabwino.' Alani anathamanga kupita ku munda ndipo anabwerera msanga ndi tomato wabwino. Atate ake anati, 'Uike m'dishi umo'. Ndipo anamulangiza m'dishi momwe munalibe kanthu. Alani anacita monga anauzidwa. Atate ake anatinso, 'Pita kukatyola tomato woola uwiri'. Ici cinadabwitsa Alani. Koma anapita napeza tomato woola uwiri ndipo anapita nao kwa atate ake. 'Uike pamodzi ndi wabwino', anatero atate ake. 'Koma atate, tomato woola udzaononga tomato wabwino', anati Alani. 'Cita monga ndakuuza, Alani', anatero atate ake. Alani anamvera ndipo atate ake anaika dishi kutali.

Patapita masiku awiri Alani ndi atate ake anapita kukaona tomato utatu uja m'dishi. Tomato unalimo. Alani anali wodabwa kuona kuti tomato wabwino tsopano unali woola kwakuti unali wofunika kuutaya cabe komabe ndiye cinthu comwe anali kuciyembekeza.

'Tamvera tsopano, Alani', anatero atate ake, 'Ici cidzakhala tero ngakhale kwa mnyamata yemwe amakhala ndi anyamata oipa. Monga tomato wabwino unakhala woola cifukwa unali pamodzi ndi woola, tero mnyamatayo adzaphunzira makhalidwe oipa cifukwa apezeka pamodzi ndi anyamata a makhalidwe oipa.'

Baibulo likamba kuti 'Mayanjano oipa aipsa makhalidwe okoma', (1 Akorinto 15.33). Ici citanthauza kukhala ndi abwenzi oipa kudzaononga macitidwe abwino. Baibulo limanenanso kuti, 'Mnzao wa opusa adzaphwetekedwa' (Miyambo 13.20). Tsono mnyamata yemwe adzapitiriza kukhala ndi abwenzi a makhalidwe oipa nayenso adzakhala woipa, ndipo pothera adzapita ku cionongeko, monga tomato woola unafunika kuponyedwa kutali.

Lekani kuti Ambuye Mulungu akupatseni mtima watsopano kuti mukhale m'modzi wa anthu ake okonda kukhala pafupi naye.

6. Kuwerenga Baibulo (20 min)

- Uzani aphunzi kutsegula Baibulo lao.
- Werengani pamodzi Marko 2.1-12.
- Khalani m'magulu ang'ono ndipo uzani aphunzi kuyankha mafunso awa omwe mulemba pa bolodi.

Mafunso

1. Fotokozani mwacidule zimene zinacitika m'nthano.
2. Kodi tingaphunzire ciani m'nthano iyi pa nkhani ya ubwenzi?
3. Abwenzi anai anapita kwa Yesu ndi bwenzi wao amene anadwala manjenje. Nanga ife tingapereke bwanji abwenzi athu kwa Yesu?
4. Kodi inu mungakhale bwanji bwenzi wabwino kwa anthu ena?

- Itakomana 10 minutes, kambiranani pamodzi. Mayankho abwino ali conco:

1. **Fotokozani mwacidule zimene zinacitika m'nthano.**

Yankho: Anzake a munthu wodwala manjenje anampereka kwa Yesu.

2. **Kodi tingaphunzire ciani m'nthano iyi pa nkhani ya ubwenzi?**

Yankho: Mwacitsanzo kuthandizana, kuperekana kwa Yesu.

3. **Abwenzi anai anapita kwa Yesu ndi bwenzi wao amene anadwala manjenje. Nanga ife tingapereke bwanji abwenzi athu kwa Yesu?**

Yankho: Mwacitsanzo mwa kuwapempherera, kuwauza za Yesu ndiponso kukhala citsanzo cabwino ca Mkristu wabwino.

4. **Kodi inu mungakhale bwanji bwenzi wabwino kwa anthu ena?**

Yankho: Aliyense ayankhe pa yekha.

6. Nthano ya m'Baibulo (20 min)

- Masulirani bwino mogwiritsa nchito mau osabvuta, nthano yopezeka m' Marko 2.1-12 (uphunzitsi wa Sukulu Sondo wa ana).
- Fotokozani zimene tingaphunzire m'nthano iyi:
 1. Cikhululukiro ca macimo ndico cofunikira koposa.
 2. Abwenzi oona amathandizana kutumikira ndi kumvera Mulungu.

7. Sewero (10 minutes)

- Taphunzira kuti abwenzi amathandizana ndiponso kuti amakhulupirirana. Sewerani sewero kuonetsa izi ziwiri. Mangani mphunzi m'modzi ku maso. Mphunzi wina amuuza kumene ayenera kuyenda. Mphunzi m'modzi omangidwa maso ayenera kumvera bwino kwambiri ndi kukhulupirira kuti womthandiza athandiza bwino. Osagwirana, kambiranani cabe!

8. Kutsiriza (5 min)

- Funsani anyamata ndi atsikana zimene aphunzira lero.
- Bwezeraninso kuti colinga ca miyoyo yathu ndico kumtumikira, kumumvera ndi kumlemekeza Mulungu m'zonse zomwe ticitira. Fotokozani kuti tiyenera kudziwa Yesu kuti timvere Mulungu moyenerera. Aphunzitseni 1 Akorinto 10.31b, 'Citani zonse ku ulemmerero wa Mulungu'.
- Pempherani.

Phunziro 4 Kukakamizidwa ndi abwenzi

Cofunikira pa nthawi yophunzitsa

- Bolodi
- Coko
- Baibulo

1. Kulandiridwa (10 min)

- Landirani onse.
- Pempherani.
- Funsani anyamata ndi atsikana zimene akumbukira za phunziro 3.
- Bwezeraninso kuti kucokera ku nthawi ya kucimwa koyamba, zonse zionongeka. Ubwenzi wonse ndi woonongeka. Nthawi zina anthu abvutidwa ndi anthu ena kucita zimene iwo safuna kapena zimene siziri bwino. Ici ndi mutu wa lero: kukakamizidwa ndi abwenzi.

2. Kusewera sewero (10 minutes)

- Sankhani anyamata awiri ndi atsikana awiri kupita pabwalo.
- Fotokozani zocita kwa ena onse amene ali m'kati koma iwo amene akhala pabwalo asakumvereni.
- Fotokozani iwo amene akhala m'kati: ayenera kusewera sewero monga ali kuyenda pa mseu ndipo akoma ndi anzao. Iwo onse amene akhala m'kati ndiwo anzao, koma amene akhala pabwalo si ndiwo anzao (koma okhala pabwalo sayenera kudziwa ici). Anyamata ndi atsikana amene akhala m'kati ayenera kusasamalira anyamata ndi atsikana amene akhala pabwalo. Ngati iwo okhala pabwalo ayamba kulankhula, iwo okhala m'kati sawamvere ndipo sakambe nao. Ngati afuna kupatsa moni, iwo ayenera kuwakanira.
- Itani iwo amene akhala pabwalo kuti abwere m'kati ndipo fotokozani kwa onse kucita monga akuyenda pa mseu ndipo akumana ndi abwenzi ao.
- Sewerani sewero. Iwo amene anakhala pabwalo adzamvera kusasamalidwa cifukwa kulibe munthu aliyense amene afuna kukamba nao.
- Atasewera sewero, funsani iwo amene anakhala pabwalo kuti amvera bwanji.

3. Kukakamizidwa ndi abwenzi (5 minutes)

- Fotokozani citanthauzo ca 'kukakamizidwa ndi abwenzi'. Citanthauza: kukakamizidwa kucita zimene abwenzi ndi ena acita. Ngati simucita zimene ena acita, simulandiridwa m'gulu. Simudzasamalidwa (cimodzimidzi monga iwo amene anakhala pabwalo pa nthawi ya sewero). Mau ena a 'kukakamizidwa ndi ubwenzi' ndi 'kukopedwa ndi gulu'.
Mwacitsanzo:
 - Pamene muli kuceza ndi anzanu ndipo iwo onse ayamba kukoka fodya, mudzapanikizika kukokanso fodya. Ngati mukana, mudzamva monga inu si m'modzi wa gulu.
 - Pamene muona kuti anzanu onse anagula nsapato zatsopano, mudzafunanso nsapatso zatsopano.
 - Pamene gulu la anzanu afuna kuba, adzakukakamizani kuyenda nao.
- Uzani anyamata ndi atsikana kupatsa zitsanzo zina za kukakamizidwa ndi abwenzi.

4. Kuwerenga Baibulo (30 min)

- Uzani aphunzi kutsegula Baibulo lao.
- Werengani pamodzi nthano ya Sadrake, Mesake ndi Abedinego (Danieli 3).
- Atawerenga pamodzi, aphunzi akhale m'magulu ang'ono kuyankha mafunso awa omwe mulemba pa bolodi:

Mafunso

1. Fotokozani mwacidule zimene zinacitika m'nthano.
2. Ndi cifukwa ciani Sadrake, Mesake ndi Abedinego sanagwadire?
3. Kodi tingaone bwanji citsanzo ca kukakamizidwa m'nthano iyi?
4. Kodi tingaphunziremo ciani m'nthano iyi pa nkhani ya kukakamizidwa?

- Itakomana 10 minutes, kambiranani pamodzi mayankho. Mayankho abwino ali conco:
 1. **Fotokozani mwacidule zimene zinacitika m'nthano.**
Yankho: Mfumu Nebukadinezara anafuna anthu onse kugwadira fano la golidi. Iwo amene sagwada adzaponyedwa m'ng'anjo ya moto. Anthu onse anagwada kupatula Sadrake, Mesake ndi Abedinego. Iwo anaponyedwa m'ng'anjo ya moto koma Mulungu anawapulumutsa.
 2. **Ndi cifukwa ciani Sadrake, Mesake ndi Abedinego sanagwadire?**
Yankho: Mulungu atiletsa kugwadira ciriconse koma lye yekha. Ndiye kugwadira fano la mfumu ndiko chimo.
 3. **Kodi tingaone bwanji citsanzo ca kukakamizidwa m'nthano iyi?**
Yankho: Sadrake, Mesake ndi Abedinego anali anthu okha amene sanagwade. Anthu anawakamiza kugwada. Kupanikizidwa kusamvera Mulungu kunali kwakukulu.
 4. **Kodi tingaphunziremo ciani m'nthano iyi pa nkhani ya kukakamizidwa?**
Yankho: Imani nji, osalondola gulu, koma mverani Mulungu nthawi zonse. Mulungu akuonani ndipo akhoza kukupulumutsani (koma angakhale sakupulumutsani, mverani Mulungu! Danieli 3.18).

5. Nthano ya m'Baibulo (20 min)

- Masulirani bwino mogwiritsa nchito mau osabvuta, nthano yopezeka m'Danieli 3 (uphunzitsi wa Sukulu Sondo wa ana).
- Fotokozani zimene tingaphunzire m'nthano iyi:
 1. Tiyenera kuima nji ndi kukana kucimwa.
 2. Mulungu ndi wamphamvu zonse.

6. Kufotokoza 'kukakamizidwa ndi abwenzi m'njira yabwino' (20 minutes)

- Fotokozani kuti lero tamva kuti kukakamizidwa ndi abwenzi ndi cinthu coipa. Koma kukakamizidwa ndi abwenzi kungakhale kwabwino m'njira ina. Kukakamizidwa ndi abwenzi m'njira yabwino kutanthauza: kulimbikitsidwa kwabwino ndi kupangiridwa bwino ndi abwenzi. Mwacitsanzo: Mnyamata m'mudzi sankapita ku calichi koma nthawi ina anapitako cifukwa anzake onse anapita.
- Citsanzo cina ca kukakamizidwa ndi ubwenzi m'njira yabwino ndi ici:
Rakele (12) ndi Davide (14) anali ana a masiye pamene amai ao anafa zaka ziwiri zapitazo. Amakhala ku nyumba ya agogo ao, koma agogo ao ndi okalamba ndi ofooka kwambiri. Sabata latha Rakele ndi Davide anayamba kuphunzira ku sukulu lanu. Amaoneka ngati akumva cisoni. Kodi anzaao angacite ciani kuti iwo akhale omasuka koposa?
- Kambiranani pamodzi za izi.

7. Closing (5 min)

- Funsani anyamata ndi atsikana zimene aphunzira lero.
- Bwezeraninso kuti colinga ca miyoyo yathu ndico kumtumikira, kumumvera ndi kumlemekeza Mulungu m'zonse zomwe ticita. Fotokozani kuti tiyenera kudziwa Yesu kuti timvere Mulungu moyenerera. Aphunzitseni 1 Akorinto 10.31b, 'Citani zonse ku ulemerero wa Mulungu'.
- Pempheerani.

Phunziro 5 Kusamalira cilengedwe ndi thupi langa

Cofunikira pa nthawi yophunzitsa

- Bolodi
- Coko
- Baibulo

1. Kulandiridwa (10 min)

- Landirani onse.
- Funsani anyamata ndi atsikana zimene akumbukira za phunziro 4.
- Fotokozani kuti tinaphunzira kuti anthu onse analengedwa ndi Mulungu. Mulungu analenganso cilengedwe cina. Tidzaganizirako ici lero.

2. Kusamalira thupi langa (20 min)

- Fotokozani kuti Mulungu anatilenga. Cifukwa cace tiyenera kukhala maso ndi matupi athu ndi kuwasamalira bwino: makhalidwe abwino ndi ukhondo. Kodi tingamve bwanji ngati munthu wina sasamalira mphatso imene tinampatsa?
- Funsani anyamata ndi atsikana zitsanzo za m'mene tingasamalire matupi athu.
- Fotokozani *mwacidule* kuti kusamalira matupi athu kutanthauza:
 - o Kudya ndi kumwa (osati zambiri, osati zazing'ono, cakudya cabwino ndi cakudya ca mtundu wosiyana-siyana)
 - o Kusamalira bwino thupi kuti likhale labwino (kusamba, kutsuka mano, kusamba manja kutapita ku cimbudzi, ndi zina zotere) ndiponso kupita ku cipatala tikadwala.
 - o Masewero olimbitsa thupi (masewero abwino athandiza thupi kukhala lolimba)
 - o Kupumula ndi kugona (kugona bwino kuthandiza kucita bwino ku sukulu)
- Funsani anyamata ndi atsikana kuti cotsatira ca mowa ndi mankhawala ozunguza bongo ndico ciani kuli matupi athu.

Yankho: Pa kumwa mowa ndi kugwiritsa nchito mankhawala ozunguza bonga, tiononga matupi athu. Kanani ndipo imani nji! (onani pa mfundo 3 za njira ya kukana).
- Funsani aphunzi kuti cotsatira ca dama ndi cigololo ndico ciani kuli matupi athu.

Yankho: Ngati ticita izi, tiononga matupi athu. Mulungu satilola kusewera kotero ndi matupi athu. Kuli mpata waukulu wotenga matenda (STI's, HIV/AIDS) ndipo makhalidwe otero owawitsa m'mtima.

3. Cilankhulo ca m'thupi (20 min)

- Fotokozani kuti Mulungu anatipatsa matupi athu ndipo kuti tingawagwiritse nchito polankhula, mwacitsanzo maonekedwe a nkhope, kuyang'ana maso, kugwiritsa nchito manja/mapazi, kaimidwe ka thupi, mau (pamwamba/pansi, msanga/pang'ono).
- Uzani mphunzi m'modzi kupita pabwalo. Muuzeni kuti ayenera kupita patsogolo pa gulu ndi kuonetsa kuti ndiye wosangalala. Koma saloledwa kulankhula. Ndiye ayenera kugwiritsa nchito thupi lake kuonetsa kuti akumva bwanji. Aphunzi ena ayenera kuganizira kuti akumva bwanji.

Uzani enanso kuonetsa: mantha, cisoni, manyazi.
- Fotokozani kuti cilankhulo ca m'thupi liyenera kugwirizana ndi mau pa nthawi yokambira.
- Fotokozani njira yogwiritsa nchito thupi pa kunena 'iai'. Patsani citsanzo ca kunena 'iai' mwamphamvu (molimba mau, kuyang'ana maso) ndi mofooka (kuyang'ana pansu,

kusalimba mau, kucita manyazi). Ngati tifuna kunena 'iai' mwamphamvu tiyenera kudziwa cifukwa cace ca kukana: ngati sitikhala otsimikiza za kukana, tidzakana mokayika. Ndiye dziwani zimene mufuna ndi zimene musafuna, ganizirani moyo wanu!

4. Kusamalira cilengedwe (20 min)

- Fotokozani kuti Mulungu sanalenge matupi athu ndi anthu ena cabe, komanso cilengedwe cina. Cifukwa cace tiyenera kucisamalira bwino, ticifuna kuti tikhale ndi moyo wabwino.
- Funsani anyamata ndi atsikana kupatsa zitsanzo za kusamalira bwino cilengedwe cotizungulira.
- Fotokozani kuti kusamalira cilengedwe kutanthauzanso:
 - o Kutsuka (nyumba, cimbudzi, malo ozungulira nyumba).
 - o Kutaya bwino zinyalala. Kutaya zinyalala m'cilengedwe cinyengerera kanyama kang'ono kamene kanyamula matenda. Kuononganso zomera ndi mitengo zimene tifunika kukhala ndi umoyo wathanzi.
Potaya-taya zinyalala tiononga cilengedwe: nyama ndi tizirombo zingafe koma tizifuna cifukwa ca zipatso ndi masamba. Ng'ombe ndi nkuku zimadya zomera, ndiye ngati cilengedwe ciri bwino, nyamanso zidzakhala bwino ndipo cakudya cathu zidzakhalsanso bwino. Mphepo icokera m'mitengo ndi zomera. Anthu amakamba za kusinthika kwa nyengo: nthawi zambiri sitisamalira cilengedwe koma ticifunika!
Kambiranani zimene tingacite ndi zinyalala zathu.
 - o Kugwiritsanso nchito. Gwiritsaninsu nchito zikwama, pangani zinthu zatsopano mogwiritsa nchito zinthu zakale, osangotaya zimene sitifunabe koma pezani njira yozigwiritsanso nchito kapena zitayeni bwino (onani pa 'kutaya zinyalala').
- Fotokozani kuti tiri ndi mphamvu yosintha cilengedwe cotizungulira ndi tsogolo lathu (phunziro 6).

5. Kuwerenga Baibulo (20 min)

- Uzani aphunzi kutsegula Baibulo lao.
- Werengani pamodzi Miyambo 12.10 ndipo yankhani pamodzi mafunso awa:
 - 1. Kodi tingaphunzire ciani m'ndime iyi?**
Yankho: Tingazindikire ngati tikonda Mulungu poona m'mene tisamalira nyama.
 - 2. Kodi tiyenera kucita ciani kulinanga ndi ndime iyi? Patsani zitsanzo zitatu.**
Yankho: Zitsanso zoonetsa kuti tiyenera kusamalira nyama. Sitiledwa kuzipha koma cabe ngati ndizo zoopsa kapena ngati tizifuna kudya. Samalirani ng'ombe: osazimenya koposa. Kodi Mulungu akumva bwanji ngati mungocotsa mwendo wa cirombo pa cabe?
- Werengani pamodzi Genesis 2.15 ndipo yankhani pamodzi funso iri:
 - 3. Tawerenga kuti Mulungu anafuna anthu kuzisamalira dziko lapansi. Patsani zitsanzo zitatu za njira zimene tingasamalire dziko lapansi m'miyoyo yathu.**
Yankho: Aphunzi apatse zitsanso zosiyana-siyana.
- Werengani pamodzi Yohane 6.11 and 12 ndipo yankhani pamodzi funso iri:
 - 4. Yesu ananena kuti cakudya sicitayike. Kodi mumataya cakudya? Ngati mumataya, mungacite ciani m'malo mwa kutaya?**
Yankho: Aliyense ayankhe pa yekha.

6. Kutsiriza (5 min)

- Funsani anyamata ndi atsikana zimene aphunzira lero.
- Bwezeraninso kuti colinga ca miyoyo yathu ndico kumtumikira, kumumvera ndi kumlemekeza Mulungu m'zonse zomwe ticita. Fotokozani kuti tiyenera kudziwa Yesu kuti timvere Mulungu moyenerera. Aphunzitseni 1 Akorinto 10.31b, 'Citani zonse ku ulemerero wa Mulungu'.
- Pempherani.

Phunziro 6 Cikhalidwe

Zofunikira pa nthawi yophunzitsa

- Bolodi
- Coko
- Baibulo

1. Kulandiridwa (10 min)

- Landirani onse.
- Pempherani.
- Funsani aphunzi kuti ndi ciani cimene akumbukira za phunziro lotsiriza.
- Fotokozaninso kuti Mulungu anatilenga. Cifukwa cace tiyenera kusamalira bwino matupi athu. Cifukwa cace kumwa mowa ndi kusewenzetsa mankhawala ozunguza bongo ndi koipa. Izo ziononga matupi athu. Tigwiritsa nchito matupi athu pa kukamba. Tiyeneranso kusamalira cilengedwe cina conse ca Mulungu. Cifukwa zonse ndi zolengedwa ndi Mulungu.

2. Sewero (10 min)

- Uzani aphunzi kuimirira cozungulira aphunzitsi. Aphunzitsi akhale pakati pao mosungira bola.
- Aphunzitsi aponye bola ku mmodzi wa aphunzi ndipo afunse mmodziyo funso limodzi la mafunso awa:
 - Kodi ukonda kwambiri mtundu (colour) bwanji?
 - Kodi ufuna kuti udzakhala ndi nchito yanji m'tsogolo?
 - Kodi ndi ciani cimene cikucititsa mantha?
 - Kodi ndi ciani cimene cikukondweretsa?
 - Kodi ndi phunziro lanji limene ukonda kwambiri ku sukulu?
 -
 -
- Mphunzi atayankha aponye bola kuli aphunzitsi.
- Patsani mphunzi wina aliyense mpata kuyankha funsolo. Kenaka afunseni funso lina. Motero mudzadziwana bwino kwambiri.

3. Cikhalidwe

- Apatseni citsanzo ca cakudya. Cakudya cina ndi cokoma, mwacitsanzo masweetie kapena mabisiketi. Cakudya cina ndi cosakoma. Mwina cili ndi mcere (salt) wambiri kapena simungakonde cakudyaco.
- Cimodzi-modzinso anthu ena ndi okoma mtima ndipo ena ndi osakoma. Funsani kuti cifukwa ndi ciani anthu ndi osiyana: kusiyana ndi kotani ndiponso kucokera kuti?
Yankho: kuli kusiyana cifukwa ca m'mene ife tiliri: cikhalidwe cathu (character, umunthu wa munthu, za mu mtima). Kuli anthu okhulupirika komanso osakhulupirika. Kuli anthu okoma mtima komanso osakoma mtima. Kuli anthu ocitira mnzao cilungamo komanso anthu osacitira mnzao cilungamo. Kuli anthu odzikweza komanso odzicepetsa.
- Lembani mzere pa bolodi kotero kuti kuli magawo awiri. M'gawo limodzi mudzalemba cikhalidwe cabwino ndipo m'gawo lina mudzalemba cikhalidwe coipa. Funsani aphunzi

kupereka zitsanzo za cikhalidwe ca munthu wokoma mtima. Auzeni kuperekanso zitsanzo za cikhalidwe coipa. Lembani mayankho ao pa bolodi.

Mwacitsanzo:

Cikhalidwe cabwino

Kudzicepetsa

Kusamalira anthu kapena zinthu

Kukhulupirika

Kukhala wokoma mtima

Kucita cilungamo

Cikhalidwe coipa

Kudzikweza

Kusasamalira

Kusakhulupirika

Kusakhala wokoma mtima

Kusacita cilungamo

- Kenaka funseni aphunzi kuchula cikhalidwe cimodzi ca iwo okha cimene iwo akondwera naco. Achulenso cikhalidwe coipa cimodzi ca iwo okha cimene iwo afuna kusintha.
- M'Baibulo tiwerenga za anthu osiyana-siyana ndi zikhalidwe zao.
- Awerengereni aphunzi **Yobu 1.1**. Fotokozani kuti Baibulo likamba kuti Yobu anali munthu woopa Mulungu. Ico sicitanthauza kuti analibe chimo popeza aliyense ali ndi macimo. Ndi Mulungu yekha amene alibe macimo. Koma kuopa Mulungu kutanthauza kuti Yobu anacita zimene Ambuye anamuyembekezera kucita. Yobu anali woongoka. Mulungu anakhala mu mtima mwake ndipo Yobu anaopa kucita zoipa. Nanga ife kodi? Ndi ciani cimene anthu aganiza za ife?
- Awerengereni aphunzi **Genesis 6.9**. Baibulo likamba za Nowa kuti iye anali wolungama ndi wangwiro m'mibadwo yace. Nowa nayenso anakhala ndi macimo. Komanso anatomikira Mulungu ndipo anali wangwiro. Nanga ife kodi? Kodi anthu amakamba za ifenso zinthu izi zimodzi-modzi?
- Mulungu ndi wacifundo. Tiwerenga za ici m'Eksodo 34.6: *Ndipo Yehova anapita pamaso pace, napfuula, Yehova, yehova, Mulungu wacifundo ndi wacisomo, wolekereza, ndi wa ukoma mtima wocuruka ndi wacoonadi*. Zonse za Mulungu ndi woyera ndi wopanda banga. Ngakhaleso cikondi cake. Cikondi ca Mulungu ndi cosiyana ndi cikondi ca anthu. Koma Mulungu si cikondi cekha. Mulungu ndi Mulungu. Iye ndi wacifundo komanso wolungama. Mulungu ndi woyenerera ndi wopanda chimo. Ici ndi cosiyana cacikulu pakati pa Iye ndi anthu. Pamene Ambuye Yesu anali pa dziko lapansi ana kufera macimo a anthu ake, Iye anali Munthu komanso Mulungu. Analizidwa Munthu weni-weni komabe analibe chimo. Sanacimwe poganiza, pocita ndi pokamba. Anthu angakhale ndi cikhalidwe cabwino komabe angacite coipa. Si tero ndi Mulungu: Iye ndi wopanda banga.
- Fotokozani kuti anthu onse ndi osiyana ndi anzao. Iye tonse tili ndi cikhalidwe cosiyana ndi anzathu. Cikhalidwe cathu ndi cokonzedwa ndi zinthu zosiyana-siyana: kuledwa kwathu, zocitika za mu miyoyo yathu, makolo athu ndi anzathu. Komabe ife tokha tili ndi udindo pa mtundu wa cikhalidwe comwe tili naco.

4. Colowapo

- Werengerani aphunzi colowapo ici. Kenaka kambiranipo.

Benson, Rakele ndi Davide ndiwo anyamata ndi mtsikana okhala ku mudzi umodzi. Tsiku lina onse ali kupita kukatunga madzi ku citsime cimene cili m'kati mwa mudziwo. Ndi nthawi yabwino popeza iwo akatero amakumana, amakambirana ndi kuthandizana. Koma lero Rakele ali yekha. Wasiya mai wake kunyumba. Mai wake ndi wodwala ndipo Rakele adzayenera

kutunga madzi ali yekha. Ici citanthauza kuti adzayenera kupereka mabaketi olema kunyumba kangapo. Rakele ayesa kukankhira patsogola pa mzere wa anthu popeza mai wake ndi wodwala ndipo afuna kubwerera msanga. Koma Benson sabvomera. Anena, *'Iwe, ndi ciani? Ife tafika kudala kwambiri. Pita pamboyo'*. Davide sakamba ciriconse koma aoneka wosakondwa. Afuna kuthandiza Rakele koma salimba mtima kunena ciriconse. Mosakamba ciriconse, Rakele apita kukhala pambuyo ndipo angoyang'ana pansi.

M'madzulo Davide ndi Rakele aona Benson ali kubwera. Benson afuna kucaya bola. Apempha Davide ndi Rakele kucaya pamodzi. Rakele ayang'ana Benson mokalipa ndi kunena, *'Iwe ufunanji? Sunandicitire zabwino m'mawa.'* Davide abvomera ndipo Davide ndi Rakele acokapo. Benson atsalira ali yekha ndi bola lake.

Tsiko lotsatirapo iwo onse apitanso ku citsime. Agogo Amuna ali cikhalire ku citsime. Anaona zimene zinacitika mailo. Aitana Rakele, Benson ndi Davide kubwera pafupi. Anena, *'Zinthu zirizonse mukafuna kuti anthu acitire inu, inunso muwacitire iwo zotero. Baibulo likamba kuti tiyenera kukonda anzathu monga tizikonda mwini. Anthu amena amagawana ndi kuthandizana adzathandizika'*.

Kenaka mokoma mtima Benson afunsa Rakele, *'Rakele, kodi mai wako akali odwala? Lero udzakhala woyamba kutunga madzi. Ndipo ndikatsiriza ndidzakuthandiza kunyamula mabakati ako kuti ufike kunyumba msanga.'* Rakele asekerera ndi kunena, *'Zikomo Benson! Wandicitira zabwino'*. Davide nayenso athandiza kunyamula mabakati olema.

M'madzulo Benson awapemphanso kuti acaye bola. Pa nthawi imodzi-imodzi Rakele ndi Davide anena, *'Ee, tiye!'* Iwo asekerera ndi kusewera pamodzi monga abwenzi oona amacita.

Mafunso ndi mayankho:

1. Fotokozani mwacidule nkhani yamene tamvera.

Yankho: ana atatu anapita kukatunga madzi. Mmodzi wa iwo anacita mosakoma mtima. Koma m'madzulo anayembekezera iwo kusewera pamodzi. Pa nthawi ino iwo enanso awiri anayankha mopanda cifundo. Tsiku lotsatirapo iwo onse anaphunzira phunziro lofunikira kwambiri locokera ku agogo: *'Konda mnzako monga udzikonda iwe mwini'*.

2. Kodi ndi ciani cimene Benson sanacite bwino ndipo anakonza bwanji khalidwe lake loipa?

Yankho: sanamvetse kuti Rakele anafunika thandizo cifukwa ca kudwala kwa mai wake. Bensoni anakalipa ndipo anali wosakoma mtima kwa Rakele. M'madzulo iye sanapepetse koma anangoganiza kuti Rakele ndi Davide analeka kukwiya naye. Tsiku lotsatirapo Benson anacita mokoma mtima ndi kuthandiza Rakele.

3. Kodi ndi ciani cimene Rakele akadacita mosiyana?

Yankho: Rakele akadafotokoza kuti mai wake anadwala, Benson akadamulola kukhala woyamba kutunga madzi. Pamene Benson anapempha kucaya bola m'madzulo, Rakele anamuyankha mwacipongwe. Ngakhale Benson anali wosakoma mtima, Rakele anayenera kumucitira zabwino. Rakele nayenso anafunika kuphunzira kuti ayenera kukonda mnzake monga adzikonda iye mwini.

4. Nanga inu mumacita ciani pamene wina akucitirani zoipa?

Yankho: aliyense ayankhe pa yekha.

5. Kodi Ambuye Yesu anayankha bwanji anthu omucitira zoipa?

Yankho: Yesu ndi citsanzo cathu ceni-ceni ca kuyankha adani athu. Iye anawakonda, anawapempherera ndi kuwakhulukira.

6. Kodi ndi ciani cimene tingaphunzire m'nthanyoyi?

Yankho: aliyense ayankhe pa yekha.

5. Kuwerenga Baibulo (30 min)

- Aphunzitsi asanayambe kuwerenga Baibulo, afotokoze aphunzi kuti kuli njira zosiyana-siyana zoyankhira. Cikhaliidwe cathu (character) ndi cinthu cimodzi ca zinthu zokhuza momwe tiyankhira. Kodi cikhaliidwe cathu ndi cotani? Kodi timayankhira bwanji anthu ena? M'kuwerenga Baibulo tidzayang'anirapo anthu awiri amene anali osiyana m'kuyankha kwao.
- Uzani aphunzi kutsegula Baibulo lao ndipo werengani Genesis 4.1-9 ndi Luka 15.11-23.
- Lembani mafunso awa pa bolodi ndipo uzani aphunzi kuyankha mafunsowa m'magulu ang'ono.

Mafunso a nkhani ya m'Genesis 4.1-9

5. Kodi maina a ana amuna a Adamu ndi Hava ndi ciani?
6. Kodi Abele ndi Kaini anali ndi nchito zANJI malingana ndi m'ndima ya 2?
7. Ndi cifukwa ciani Kaini anakalipa?
8. Kodi Kaini anacita ciani cifukwa ca kukalipa kwake monga mwa m'ndime za 8 ndi 9?
9. Kodi inu muona cikhaliidwe coipa cotani m'Kaini?
10. Kodi tingaphunziremo ciani m'nthano iyi?

Mafunso a nkhani ya m'Luka 15.11-24

7. Kodi mwana wamwamuna wamng'ono anapempha ciani tate wake monga mwa m'ndime ya 12?
8. Kodi mwanayo anacita ciani ndi ndalamazo monga mwa m'ndime ya 13?
9. Kodi mwanayo anaphunzirapo ciani pamene anataya zonse kukhala wopanda ciriconse?
10. Kodi tate anayankha bwanji pamene mwana wake wamng'ono anabwerera monga mwa m'ndime za 20, 22 ndi 23?
11. Kodi tingaphunzire ciani m'nthano iyi kuli mwana wamng'ono ndi tate wake?

- Itakumana 10 minutes, kambiranani pamodzi. Mayankho abwino ali tero:

Mafunso a nkhani ya m'Genesis 4.1-9

1. Kodi maina a ana amuna a Adamu ndi Hava ndi ciani?

Maina ao a ana amuna a Adamu ndi Hava ndi Kaini ndi Abele.

2. Kodi Abele ndi Kaini anali ndi nchito zANJI malingana ndi m'ndima ya 2?

Abele anakhala mbusa wa nkhusa ndipo Kaini anali mlimi.

3. Ndi cifukwa ciani Kaini anakalipa?

Kaini anatenga zipatso za nthaka nazipereka nsembe ya kwa Yehova. Abele anatenga mwana woyamba wa nkhusa zace namupereka nsembe kwa Yehova. Mulungu sanayang'anire nsembe ya Kaini. Ndipo ici cinakalipitsa Kaini.

4. Kodi Kaini anacita ciani cifukwa ca kukalipa kwake monga mwa m'ndime za 8 ndi 9?

Anamenya mbale wake mpaka kufa ndipo ananena bodza pamene Mulungu anamufunsa kuti mbale wake ali kuti.

5. Kodi inu muona cikhaliidwe coipa cotani m'Kaini?

Kaini anamva nsanje ndi Abele. Anakalipa msanga. Ananena bodza. Anapha mbale wake.

6. Kodi tingaphunziremo ciani m'nthano iyi?

Aliyense ali ndi cikhalidwe cace. Tingalingane maonekedwe koma Mulungu aona mitima yathu. Abele anapereka nsembe mwacikondi. Kaini anapereka nsembe mofuna kulemekezedwa. Kaini anamva nsanje ndi mbale wake. Cotsatira ca nsanje iyo inali yakuti Kaini anakwiya kwambiri kotero kuti anamenya mbale wake mpaka kufa. Kumva nsanje kungakhale ndi zotsatirapo zoipa zazikulu. Pemphani Ambuye Mulungu kukupewetsani kumva kotere.

Mafunso a nkhani ya m'Luka 15.11-24

7. Kodi mwana wamwamuna wamng'ono anapempha ciani tate wake monga mwa m'ndime ya 12?

Anafuna kulandira cake pa cuma, tate wake asanafe.

8. Kodi mwanayo anacita ciani ndi ndalamazo monga mwa m'ndime ya 13?

Analonga katundu wake wonse, anapita kutali, anataya ndalama zonse mpaka zatha. Mwanayo sanafunenso konse tate wake.

9. Kodi mwanayo anaphunzirapo ciani pamene anataya zonse kukhala wopanda ciriconse?

Anaphunzira kuti anayenera kubwerera kwa tate wake. Anaphunziranso kuti sanayenere kukhalanso mwana wake wamwamuna ndiponso kuti anayenera kumupempha tate wake cikukulukiro pa zoipa zimene iye anacita. Ngati tate wake adzamuza kuti iye mwanayo adzakhala monga wanchito, adzalandira cabe ndi kubvomera.

10. Kodi tate anayankha bwanji pamene mwana wake wamng'ono anabwerera monga mwa m'ndime za 20, 22 ndi 23?

Anakhululukira mwana wake wamng'ono ndipo anamulandira monga mwana wake. Anamupatsa zobvala zokongola ndipo anakonzekera cakudya cabwino koposa.

11. Kodi tingaphunzire ciani m'nthano iyi kuli mwana wamng'ono ndi tate wake?

Mwana wamwamuna wamng'ono anabwerera kwa tate wake iye atazindikira kulakwa kwake ndi kuonetsa cisoni. Anabwerera cifukwa ca zobvuta zimene iye anakumana nazo komanso cifukwa anakonda tate wake. Tate anacita phwando cifukwa ca kubwerera kwa mwana wake. Ici citisonjeza pa kukondwera kwa Mulungu pamene munthu wocimwa abwerera kwa lye ndi kupempha cikukulukiro. Nkhaniyi itionetsanso kuti Ambuye afuna kutikhululukira macimo athu.

6. Sewero: mafunso a m'Baibulo (20 min)

- Uzani aphunzi kukhala m'magulu atatu.
- Fotokozani kuti mudzawafunsa mafunso a m'Baibulo. Gulu loyamba lidzayamba kuyankha. Ngati ayankha bwino, iwo adzapatsidwa pointsi imodzi. Ngati sayankha bwino, gulu lina adzapatsidwa mpata kuyankha.
- Gulu limene lidzatenga mapointsni ambiri kuposa magulu ena onse ndilo lopambana.

Mafunso

1. Kodi Nowa anamanga ciani? **Chombo.**
2. Kodi anthu oyamba a pa dziko lapansi anali yani? **Adamu ndi Hava.**
3. Chulani dzina la munthu yemwe anagulitsidwa ndi abale ake. **Yosefe**
4. Chulani dzina la mai wa Yesu? **Mariya ndiye mai wa Yesu.**
5. Kodi ndani amene anapereka Yesu? **Yudase.**
6. Yakobo anali ndi ana amuna angati? **Yakobo anali ndi ana amuna ali 12.**
7. Kodi muli mabuku angati m'Baibulo? Cipangano cakale ndi catsopano pamodzi. **Mabuku ali 66.**
8. Kodi ndi zodabwitsa zingati zimene Mulungu anacita mu Aigupto? **Mulungu anacita zoopsa khumi m'Aigupto.**
9. Kodi Rute anakwatiwa ndi yani? **Rute anakwatiwa ndi Boazi**
10. Culani dzina la mfumu ya m'nkhani ya Estere? **Mfumu Ahaswero.**
11. Chulani maina a abwenzi atatu a Danieli. **Abwenzi atatu ali Sadrake, Misaeli ndi Mesaki.**
12. Danieli anachita ciani katatu pa tsiku lililonse? **Anapemphera kwa Mulungu.**
13. Kodi ndani anapha Abele, mwana wa Adamu ndi Hava? **Kaini anapha Abele.**
14. Kodi mkazi wa Abramam anali yani? **Sarai anali mkazi wa Abramam.**
15. Ndi ciani cimene cinacitika pa tsiku lacisanu loyera? **Pa tsiku lacisanu loyera Ambuye Yesu anafa pa mtanda.**
16. Dzina la Saulo linasinthidwa. Kodi dzina lake latsopano linali ciani? **Dzina lake latsopano ndi Paulo.**
17. Chulani dzina la wophunzira wa Yesu amene anakana Yesu katatu. **Dzina ndi Petro.**
18. Kodi dzina la mwana wa Abramam ndi Sarai ndi ciani? **Mwana wa Abramam ndi Sarai ndi Isake.**
19. Kodi timakumbukira ciani pa Khristmasi? **Tikumbukira kubadwa kwa Yesu Kristu.**
20. Kodi Ambuye Yesu anafa bwanji? **Jesu anafa pa mtanda.**
21. David anagonjetsa munthu wamkulu ndi wamphamvu. Kodi dzina la munthuyu anali yani? **Anali Goliyati.**
22. Yona anauzidwa ndi Mulungu kuti ayenera kupita ku Nineve. Sanafune. Alowa m'bwato ndipo kunabwera mphepo yaikulu kwambiri-mbiri. Yona anayenera kuponyedwa pa madzi. Kodi ndi ciani cimene cinamucitikira? **Anadyedwa ndi nsomba.**
23. Baibulo liri ndi magawo awiri. Kodi magawo awiri achedwa bwanji? **Cipangano chakale ndi Cipangano Catsopano.**
24. Kodi Mulungu anapanga dziko lapansi m'amasiku angati? **Analenga dziko lapansi mu masiku asanu ndi limodzi.**
25. Kodi Yesu anabadwira kuti? **Yesu anabadwira ku Bethlehemu.**
26. Kodi atate mu fanizo la mwana wolowerera anacita ciyani pamene wamng'onoyo anabwerera kunyumba? **Anakondwa koposa malire, analandira mwana wake ndi mkono otsegula ndipo anapha ng'ombe yonenepa. Anasankalala.**
27. Cifukwa ciyani Adamu ndi Hava anadya chipatso choletsedwa? **Anakana kumvera Mulungu cifukwa anafuna kulingana ndi Mulungu.**
28. Kodi maina a ana a Nowa anali iyani? **Semu, Hamu ndi Yafeti.**
29. Kodi dzina la wopempha wakhungu amene anafunsa Yesu thandizo anali yani? **Bartimeyu.**
30. Kodi amene anataya ng'ombe ndi nkhoa zake zones ndi ana ake onse mu tsiku limodzi? **Jobu.**
31. Kodi anali abwenzi angati amene anampereka munthu wamanjenje kwa Yesu? **Abwenzi anai.**
32. Kodi dzina la mwamuna anapita kwa Yesu pakati pa usiku ndi mafunso anali yani? **Nikodemo.**

Phunziro 7 Tsogolo langa

Cofunikira pa nthawi yophunzitsa

- Bolodi
- Coko
- Baibulo

1. Kulandiridwa (10 min)

- Landirani onse ndipo pempherani.
- Funsani anyamata ndi atsikana zimene zinaphunzitsidwa m'phunziro 6.
- Fotokozani kuti anthu onse ndi osiyana ndi anzao. Iye tonse tili ndi cikhalidwe cosiyana ndi anzathu. Cikhalidwe cathu ndi cokonzedwa ndi zinthu zosiyana-siyana: kuleredwa kwathu, zocitika za mu miyoyo yathu, makolo athu ndi anzathu. Komabe ife tokha tili ndi udindo pa mtundu wa cikhalidwe comwe tili naco.
- Anthu angakhale ndi cikhalidwe cabwino komabe angacite coipa. Si tero ndi Mulungu: Iye ndi wopanda banga.

2. Zilakolako zathu (5 min)

- Uzani mphunzi aliyense kuuza mnzake za zolakolako zake za tsogolo. Kambani za: sukulu, ukwati, mudzi, nchito, umoyo wa masiku onse ndi zina zotere.
- Fotokozani kuti ife tonse tiri ndi maganizo a tsogolo lathu. Sitidziwa zimene zidzagitika m'tsogolo (Mulungu alamulira miyoyo yathu, Yakobo 4.15) komabe kuganizira tsogolo ndi kwabwino.

3. Sukulu (25 min)

- Funsani aphunzi ndi cifukwa ciani kupita ku sukulu ndi kofunikira.
- Fotokozani kuti kuli mabvuto ambiri otiletsa kupita ku sukulu kapena kutsiriza sukulu.
- Pangani magulu anai ndipo uzani gulu lirilonse kukambirana colowapo cimodzi. Itakomana 10 minutes, kambiranani pamodzi mayankho.

Colowapo 1 Belita

Belita ali ndi zaka 14. Ali m'giredi 7. Aphunzitsi ake acimuna afuna kuyenda naye ca mwanseri. Mphunzitsi ali naye m'cikondi. Amamupatsa Belita ndalama, zobvala ndi sopo.

Funso: Kodi ngati ndinu mnzake wa Belita, mudzamuza kuti acite ciani?

Yankho: Ayenera kusalandira mphatso, cifukwa ngati alandira, mphunzitsi adzaganiza kuti Belita amukonda ndipo ici cidzabweretsa mabvuto. Belita ayenera kuuza wina amene akhoza kumpangira bwino ndi kumthandiza kuima nji.

Colowapo 2 David

David ali ndi zaka 16. Ali m'giledi 9. Ali wocenjera kwambiri. Kulipira ndalama ya sukulu ndi kobvuta, koma akwaniritsa. Tsiku lina mnzake anena ndi iye: 'Bwera, tipite pamodzi, ndapeza njira kukhala wolemera. Udapeza ndalama zambiri pogwira nchito zaka zocepa ndipo pambuyo pace udzagitiriza sukulu'.

Funso: Kodi ngati ndinu mnzake wa Davide, mudzamuza kuti acite ciani?

Yankho: Davide ayenera kupitiriza sukulu monga anacita kale. Ngati aleka kupita ku sukulu, kuyambanso kudzakhala kobvuta. Cabwino coposa ndi kutsiriza sukulu kuti kenaka

angagwiritse nchito. Komanso nchito yotero yopeza ndalama mwasanga ndiyo nchito yotani, kodi lamulo libvomereza nchito yotero?

Colowapo 3: Gire

Gire ali ndi zaka 17. Ali m'giledi 9. Asanalembe mayeso azindikira kuti ali ndi mimba. Adziwa dzina la mnyamata amene anampatsa cabe. Aganiza za kuleka sukulu ndi kusamalira mwana wake.

Funso: Kodi ngati ndinu mnzake wa Gire, mudzamuuzza kuti acite ciani?

Yankho: Kupitiriza sukulu, kupeza wina amene angasamalire mwana ndiponso kuleka kusewera ndi anyamata.

Colowapo 4: Benson

Benson ali ndi zaka 15. Ali m'giredi 8. Makolo ake sakwaniritsa kulipira ndalama ya ku sukulu. Benson aganiza za kuleka sukulu ndi kupeza nchito.

Funso: Kodi ngati ndinu mnzake wa Davide, mudzamuuzza kuti acite ciani?

Yankho: Kusaleka sukulu koma kupeza njira yogwira nchito kuti angathandize kulipira sukulu (mwacitsanzo maganyu). Ngati sakwaniritsa, ayenera kupita ku mphunzitsi wake kulankhula naye.

- Funsani anyamata ndi atsikana kupereka zitsanzo zina za mabvuto owaletsa kupita ku sukulu ndiponso m'mene angathetse mabvutowa.
- Uzani aphunzi kukhala cidwi ku sukulu, cifukwa mwa kucita tero akonzekera tsogolo lao! Ngati akomana ndi mabvuto, ayenera kuuza wina amene angathandize kupeza yankho.
- Afunseni ngati adziwa anthu amene anatsiriza sukulu ndipo ali pa nchito tsono. Kodi anthuwo anakwaniritsa bwanji kutsiriza sukulu?

4. Nthenda ya kalionde-onde (HIV/AIDS) (15 min)

- Fotokozani kuti anthu ena aganiza kuti munthu wodwala HIV/AIDS alibe tsogolo labwino. Afotokozeni zoyambitsa za HIV/AIDS, mwacitsanzo kugonana kapena amai angapatse mwana wake asanabadwe.
- Muwawerengere ziganizo zolembedwa munsu. Ngati anyamata ndi atsikana aganiza kuti ciganizo ndi coona, ayenera kukweza dzanja. Ngati aganiza kuti ciganizo ndi cabodza, sayenera kukweza manja. Fotokozani kuti onse ayenera kuyankha pa iwo okha.
 1. **Ndi kotheka kuti anthu agwidwa ndi nthenda yakalionde-onde (HIV) koma sazindikira kuti ndiwo odwala ndipo aoneka kukhala ndi thanzi.**
Yankho: Zoona.
 2. **Anyamata ndi atsikana anamwali sakhoza kupangitsa wina kukhala ndi nthenda yakalionde-onde (HIV/AIDS).**
Yankho: Zabodza.
 3. **Ngati usamba utagona ndi mwamuna/mkazi, ungacotse nthenda yakalionde-onde (HIV).**
Yankho: Zabodza. HIV/AIDS ndi nthenda ya m'mwazi.
 4. **Ngati munthu agona ndi anthu ambiri, ali ndi mphata waukulu wotenga matenda akalionde-onde (HIV/AIDS).**
Yankho: Zoona.
 5. **Ngati mkazi amene akhala ndi nthenda yakalionde-onde (HIV-positive) abereka mwana, kuli mphata waukulu kuti mwana akhalanso ndi nthenda yakalionde-onde**

Yankho: Zoono.

6. **Mwamuna angaciritsidwe ku matenda akatengera ngati agonana ndi mtsikana amene sanagonepo ndi mwamuna.**

Yankho: Zabodza.

7. **Ngati ndiwe wodwala nthenda yakalionde-onde (HIV/AIDS) uyenera kuuza wokondedwa wako za kudwala kwako.**

Yankho: Zoono.

8. **Ungatenge nthenda yakalionde-onde (HIV) pa kusamba ndi kumwa madzi ocokera pa citsime.**

Yankho: Zabodza.

9. **Nthenda yakalionde-onde (HIV/AIDS) ibvutitsa anthu a ku Afirika cabe.**

Yankho: Zabodza.

10. **Ena anatenga nthenda yakalionde-onde (HIV) ngakhale anagwiritsa nchito kondomu.**

Yankho: Zoono.

11. **Anthu amene adwala nthenda yakalionde-onde (HIV/AIDS) angakhale moyo zaka zambiri ngati amamwa mankhwala ndi kumadya zakudya zabwino monga zipatso ndi zakudya zomanga thupi.**

Yankho: Zoono.

12. **Kukhala wodwala nthenda yakalionde-onde (HIV/AIDS) kutanthauza kuti Mulungu samakukonda.**

Yankho: Zabodza.

13. **Ngati anthu sacita cigololo ndi dama, bvuto la nthenda yakalionde-onde (HIV/AIDS) lingacepetsedwe.**

Yankho: Zoono.

- Mangirirani kukambirana ndi kunena kuti tiyenera kukhala monga za m'Baibulo osagona ndi anthu osiyana-siyana.

4. Ukwati (15 min)

- Funsani anyamata ndi atsikana ngati adziwa anthu amene ali m'ukwati wabwino. Ndi ciani cimene cipangitsa ukwati wao kukhala wabwino? Lembani mayankho ao pa bolodi.
- Fotokozani kuti m'ukwati wabwino muli: kukhulupirirana, kuperekana ulemu, kusamalirana. Khalani mwamuna/mkazi wabwino monga Mulungu afuna.
- Uzani aphunzi kukhala maso kuli ukwati, 'Kodi mufuna ukwati wotani?' Osathamangira ukwati: poyamba muyenera kudziwa konse mtsikana/mnyamata.

5. Kuwerenga Baibulo (15 min)

- Uzani aphunzi kutsegula Baibulo lao.
- Werengani pamodzi Yakobo 4.13-17.
- Pangani magulu ang'ono ndipo uzani aphunzi kuyankha mafunso awa omwe mulemba pa bolodi.

Mafunso

1. Kodi Yakobo alankhula za anthu otani m'ndime ya 13?
2. Kodi mudziwa anthu amene amacita motere?
3. Kodi Yakobo atanthauza ciani ndi 'muli utsi, wakuonekera kanthawi, ndi pamenepo ukanganuka' m'ndime ya 14?

4. Ndi cifukwa ciani tiyenera kunena (ndi kuganiza) zimene zalembedwa m'ndime ya 15?
 5. Kodi ndime ya 17 itanthauzanji?

- Itakomana 10 minutes, kambiranani pamodzi mayankho. Mayankho abwino ali conco:
 1. **Kodi Yakobo alankhula za anthu otani m'ndime ya 13?**
 Yankho: Analankhula za anthu amene odzikweza pa zimene akwaniritsa ndiponso za anthu oganizira za tsogolo lao monga kulibe Mulungu.
 2. **Kodi mudziwa anthu amene amacita motere?**
 Yankho: Aliyense ayankhe pa yekha.
 3. **Kodi Yakobo atanthauza ciani ndi 'muli utsi, wakuonekera kanthawi, ndi pamenepo ukanganuka' m'ndime ya 14?**
 Yankho: Ndife ofooka ndi osatetezedwa. Nthawi iriyonse tingafe. Tiyenera kukhala okonzeka mwa Yesu.
 4. **Ndi cifukwa ciani tiyenera kunena (ndi kuganiza) zimene zalembedwa m'ndime ya 15?**
 Yankho: Cifukwa tiribe mphamvu ya miyoyo yathu koma Mulungu atilamulira.
 5. **Kodi ndime ya 17 itanthauzanji?**
 Yankho: Tiyenera kucita zabwino osati kucimwa. Tinaphunzira zambiri m'maphunziro ndipo tiyenera kuzicita. Ngati sitizicita, tacimwa.

6. Mayeso (30 minutes)

Mayeso awa si okakamiza. Mphunzitsi asankhe ngati aphunzi adzalemba mayeso kapena iai. Ngati adzalemba mayeso mphunzi aliyense afunika colemba ndi pepala.

- Lembani mafunso opezeka pa pepala lotsiriza m'bukuli pa bolodi ndipo aphunzi alembe mayankho ao pa pepala lao (asankhe yankho A, B kapena C). Kapena: jambulani mayeso ndipo patsani mphunzi aliyense pepala limodzi.
- Atalemba mayeso aphunzi ayenera kupatsa mapepala ao kwa mphunzitsi.
- Mphunzitsi akonze zolakwika ndipo aconge mayeso. Mayankho abwino ali conco:

1. A	6. B
2. B	7. B
3. A	8. C
4. C	9. B
5. C	10. -

7. Kutsiriza (5 min)

- Funsani aphunzi zimene aphunzira. Alimbikitseni kuzicita.
- Bwezeraninso kuti colinga ca miyoyo yathu ndico kumtumikira, kumumvera ndi kumlemekeza Mulungu m'zonse zomwe ticita. Fotokozani kuti tiyenera kudziwa Yesu kuti timvere Mulungu moyenerera. Aphunzitseni 1 Akorinto 10.31b, 'Citani zonse ku ulemmerero wa Mulungu'.
- Pempherani.

Mayeso

Dzina

1. Pa ciyambi Mulungu analenga kumwamba ndi dziko lapansi. Ndi ciani cimene ciri coona?
 - A. Kunali ubwenzi wabwino pakati pa Mulungu, anthu ndi cilengedwe.
 - B. Mulungu sanalenge mitengo.
 - C. Mulungu anatsiriza kulenga patapita masiku anai (4).
2. Kodi colinga ca miyoyo yathu ndico ciani?
 - A. Kukhala anthu abwino.
 - B. Kumvera, kumtumikira ndi kulemekeza Mulungu.
 - C. Kumvera makolo athu.
3. Ndi cifukwa ciani tikomana ndi mabvuto m'miyoyo yathu?
 - A. Cifukwa ca macimo.
 - B. Cifukwa sitidziwa kuthetsa mabvuto.
 - C. Cifukwa makolo athu anakalipitsa mizimu.
4. Kodi tiyenera kucita ciani pamene tikomana ndi mabvuto?
 - A. Sitiyenera kucita kalikonse.
 - B. Tiyenera kupita ku ng'anga kuti atilangize.
 - C. Tiyenera kupempha Mulungu nzeru kuti tipeze mayankho abwino pa mabvuto athu.
5. Kodi ndi liu liti limene ligwirizana ndi ubwenzi?
 - A. Kusakhulupirika.
 - B. Citsanzo coipa.
 - C. Thandizo.
6. Tinamva nthano ya m'Baibulo ya wodwala manjenje. Kodi anzake a munthuyo anacita ciani?
 - A. Anamuiwala.
 - B. Anamthandiza mwa kumpereka kwa Yesu.
 - C. Analankhula zoipa za iye.
7. Kodi tiyenera kucita ciani pamene anthu ena atikakamiza kucimwa?
 - A. Tiyenera kucita zimene afuna.
 - B. Tiyenera kuima nji ndi kumvera Mulungu.
 - C. Sitiyenera kucita ciriconse.
8. Ndi cifukwa ciani tiyenera kusamalira bwino matupi athu?
 - A. Cifukwa tingacimwe ndi matupi athu.
 - B. Cifukwa tifunika matupi a thanzi kuti tigwire nchito kukapeza ndalama.
 - C. Cifukwa matupi athu ndiwo mphatso zocokera kwa Mulungu.
9. Ndi ciani cimene ciri cofunikira kwambiri m'ukwati?
 - A. Mkazi amene amvera mwamuna wake nthawi zonse.
 - B. Kukhulupirirana, ulemu ndi kusamalirana.
 - C. Nyumba yabwino.
10. Lembani fundo ziwiri zimene mukumbukira bwino za maphunziro amene munaphunzira.

1.
2.